



Sesida dals

19 da december 2017

Communitgà ils

21 da december 2017

Protocol nr.

1085

Dumonda Bucher-Brini

concernent la finanziaziun da la centrala dal clom d'agid sanitar 144
en il chantun Grischun

Resposta da la regenza

Tenor l'art. 34 al. 3 da la lescha per promover la tgira da personas malsaunas (LTM; DG 506.000) ston personas sa participar als custs dal post da coordinaziun central (centrala 144), sch'ellas vegnan transportadas d'in servetsch da transport en cas d'urgenza e d'ambulanza che appartegna ad in ospital public e ch'è vegnì alarmà da la centrala 144. L'import fixà da la regenza sto vegnir mess a quint da l'ospital e tramess al post da coordinaziun central.

Tenor l'art. 31c al. 1 da l'ordinaziun tar la lescha per promover la tgira da personas malsaunas (OLTM; DG 506.060) ston vegnir messas a quint las suandantas pauschalas per las accziuns che vegnan disponidas da la centrala 144: 50 francs per accziuns primaras dal stgalim d'urgenza 1 e 2 e 30 francs per tut las autras accziuns.

Tenor ils scleriments da l'uffizi da sanadad ston personas sa participar er en auters chantuns als custs da la centrala 144, sch'ellas vegnan transportadas dals servetschs da transport en cas d'urgenza e d'ambulanza che appartegnan ad in ospital public, uschia per exempel en ils suandants chantuns:

Chantun	Moda e maniera co che la persuna transportada sto sa participar als custs da la centrala 144
LU	Ils custs èn in element da las tariffas da transport. Sur las tariffas sa participeschan las personas transportadas als custs da la centrala 144.
SG	Per disposiziun vegnan mess a quint 61 francs als servetschs da salvament. Quels decidan, sch'els vulan adossar la summa a la persuna transportada.
TI	Ils custs da la centrala 144 èn cuntegnids a 100 pertschient en las tariffas da transport (tenor las indicaziuns dal chantun Tessin ca. 100 francs per disposiziun).
TG	En cas d'accziuns primaras vegnan dus terzs dals custs da la centrala 144 mess a quint a la persuna transportada sco pauschala (annualmain 145 francs; la participaziun vegn fixada mintga onn da nov).
VS	Per disposiziun incasseschan ils servetschs da salvament ina taxa da 100 francs.

Tar la dumonda 1: Sco mussà qua survart n'è il chantun Grischun betg il sulet chantun, nua che personas ston sa participar als custs da la centrala 144, sch'ellas vegnan transportadas dals servetschs da transport en cas d'urgenza e d'ambulanza

che appartegnan ad in ospital public. Almain ils chantuns Lucerna, Son Gagl, Tessin, Turgovia e Vallais enconuschan medemamain ina tala participaziun.

Er la centrala 144 dal chantun Turgovia vegn manada en quest connex tras il chantun, sco part da la centrala chantunala d'alarm. En il chantun Lucerna vegn la centrala 144 manada da l'ospital chantunal. Il chantun Son Gagl ha surdà la gestiun da la centrala 144 a la "Rettung St. Gallen", il chantun Tessin a la "Federazione Cantonale Ticinese Servizi Ambulanze (FCTSA)" ed il chantun Vallais a l'organisaziun chantunala da salvament dal Vallais.

Tar la dumonda 2: Na. Ils numers d'urgenza servan a differents intents. Entant ch'i vegnan clamadas – tras il clom d'agid da la polizia – atgnas forzas d'acziun, ha la centrala 144 l'incumbensa d'alarmer e da clamar il proxim servetsch da salvament disponibel. Quai cun la finamira da procurar per in emprim tractament e per in'assistenza optimala dals pazients d'urgenza al lieu e da garantir in provediment medicinal cumpetent durant lur transport. Ils custs da manaschi da la centrala 144 èn ina part dals custs dals servetschs da salvament. Ils custs da transport e da salvament ch'ils assicuraders da malsauns na ston betg surpigliar, ston vegnir pajads da las persunas transportadas. La regenza è damai da l'avis ch'i saja consequent da laschar surpigliar las persunas transportadas almain ina part dals custs da la disposiziun tras la centrala 144, cunquai ch'ellas profiteschon directamain da l'alarm e da la clamada dals transports en cas d'urgenza e d'ambulanza.

Tar la dumonda 3: Na. La regenza è da l'avis ch'ina participaziun da las persunas che vegnan transportadas d'in servetsch da transport en cas d'urgenza e d'ambulanza che appartegna ad in ospital public als custs da gestiun da la centrala 144, saja giustifitgada e ch'ina tala saja inditgada en il senn da la cofinanziazion da mesiras spezialas tras ils chaschunaders respectivamain da prestaziuns spezialas tras lur profitaders tenor l'art. 5 da l'ordinaziun da finanzas dal chantun Grischun (DG 710.110). La participaziun da las persunas transportadas als custs è commensurada en la cumparegliaziun interchantunala.

Tar la dumonda 4: Na. Sin fundament da la resposta a la dumonda 3 n'è ina regulaziun transitorica betg necessaria.



En num da la regenza

La presidenta:

B. Janom Steiner

Il chancelier:

Daniel Spadin